

Hier het ons 'n boek met 'n boodskap wat ernstige aandag verdien, insonderheid van die kant van ons kerklike voormanne. Dit is in kalme, rustige toon, met 'n seldsame oortuigingskrag, geskrywe en lees vlot. Die inhoud en verwerking van die stof getuig dwarsdeur van insig, diepgaande studie en stofbeheersing. Die skryfster was as Presidente van die „Wereldbond van Christen Jonge Vrouwen” jarelank in die gelukkige posisie om deeglik kennis te neem van hoe daar so al in verskillende lande oor die plek en die taak van man en vrou geoordeel word, en daarom kan daar na haar as gesaghebbende geluister word en verdien haar woord volle aandag. Die vraagstuk waar dit om gaan, is bowendien van aktuele betekenis en staan veral sedert die jongste wêreldoorlog in die brandpunt van die belangstelling. So hou bv. die Nederl. Herv. Kerk hom besig met die vraag, wat intussen onafwysbaar blyk, of die ampte in die kerk vir die vrou oopgestel moet word, en staan die Geref. Kerke voor die beslissing: aktiewe kiesreg vir die vrou of nie. Ook in verskillende ander Europese lande wy die kerke hulle aandag aan die onderhawige probleem. Dit is selfs een van die onderwerpe waaraan van ekumeniese kant aandag geskenk word: die Wêreldraad van Kerke het, soos die skryfster opmerk, 'n kommissie vir studie en aksie benoem met betrekking tot die plek en die werk van die vrou in die kerk. Maar nie net oorsee wek hierdie saak belangstelling op nie, ons het in ons land genoegsame aanduidings dat ons dit vroeër of later terdeë onder die oë sal moet sien en 'n beslissing daaromtrent nie langer sal kan uitstel nie. Intussen hang hierdie vraagstuk nou saam met die loop van sake op maatskaplik-staatkundig terrein. Veral sedert aan die vrou in ons land van owerheidsweë stemreg verleen is, gaan hoe langer hoe meer stemme op vir die toekenning aan die vrou van dieselfde regte en voorregte in die kerk as wat die man besit. Reeds op twee Algemene Kerkvergaderings van ons Ned. Herv. Kerk was daar beskrywingspunte wat aandring op stemreg vir die vrou in die kerk, en ons kan veilig aanneem, as ons hierdie saak in sy breë ontwikkeling beskou, dat dit op die duur maar die eerste stap tot verdere eise is. Ook in die Gefedereerde Kerke dring hierdie vraagstuk hom op.

As gevolg van die veranderinge en ontwikkelinge wat die twee agtereenvolgende wêreldoorloë in die lewe geroep het, en wat ons eenvoudig nie kan veronagsaam nie, is daar feitlik geen belemmering meer vir die vrou om op sosiale gebied as gelyke van die man op te tree nie. Sy geniet daar dieselfde kanse vir beroepskeuse en opleiding as die man. Die Kerk staan egter nog altyd eenkant en maak in die meeste lande, soos die skryfster trouens ook opmerk, nog steeds prinsipiëel onderskeid met betrekking tot die plek en taak van man en vrou. Maar — en dit is eintlik die *crux* van die hele saak — van kerkweë het dit tot dusver nog altyd nie sover gekom om die vraagstuk in die lig van die Skrif tot 'n nadruklike en opsetlike onderwerp van ondersoek te maak nie. En tog, die Kerk kan sy roeping om ook ten opsigte van die ontwikkeling van die vrouelewe 'n Skrifgefondeerde leiding te gee, nie ontduik nie; waar hierdie voorligting ontbreek, wat tot nog toe, helaas, grotendeels die geval was, word die grondslae nie reg gelê nie. In hierdie boek verwerk die skryfster nou die gegewens van die Skrif, want, sê sy tereg, die fundamente moet eers gelê word voor daar tot opbou oorgegaan kan word, en met die resultaat van haar Skrifgebonde ondersoek bied sy vir ons 'n belangrike leidraad om tot 'n oplossing te geraak. En, soos reeds gesê, die omstandighede dring ons om helderheid te verkry. Ek het die boek met klimmende belangstelling gelees en die inhoud het vir my verrassende vergesigte geopen. Die skryfster behandel die onderwerp, na 'n inleidende woord, onder die volgende hoofde: De Scheppingsgeschiedenis, Het Oude Testament, Jezus en de Vrouw, De Brieven van Paulus, Samenvatting. Ek wil die lesing en bestudering van hierdie belangrike publikasie van harte aanbeveel, en intussen die hoop uitspreek dat daar binne afsienbare tyd 'n Afrikaanse vertaling daarvan die lig sal sien, sodat dit daardeur ook in ons land die wye verspreiding mag geniet wat dit inderdaad verdien.